

四庫全書

集部

欽定四庫全書

東牟集卷六

宋 王洋 撰

五言絕句

得丁求安書云疊石境于溪心嶮然如江上之
磯作二詩戲之

心重吳山老天教閒許長事多因醉遣心半為山忙
立石標溪界疏荷限水香此翁三十載看了幾人忙

梅

隔濶已經歲相逢不置辭情如淡交久處士合吟詩
勝韻難齊俗清流不受渾宜應踐期約獨自愛黃昏

六言絕句

和固道韻問絃父小疾

木落亭皋遠思踈簾清簾暮聲閉門十日知否風月愁
人敗盟

舊傳傳箭聊城海內羣工舊名况有文章老伴朱顏碧
落仙卿

惆悵休尋舊事
酣歌且數前山
待君蒼蘚重拂
相逐寧
論興闌

七言絕句

幽園即事

屋頭積雨漲春雪
舍北夭桃堆暮霞
細雨斜風妨病起
牕間把玩數枝花

籬邊楊柳似羅敷
裊裊娉娉十五餘
無賴風光相料理
忽看柯葉可藏烏

殘梅依草遣愁盡細草綠堦滿意生莫道中年春思少
每逢佳處眼偏明

曉牕晴哢丁寧語晚樹幽花委曲香散策尋春不知遠
片雲作雨度回塘

遣興

老如認老應無病貧要安貧可免憂貧病欺人須服弱
嗔拳笑面却應休

遷學

闕里荆榛一掃除文明猶是舊規模要令多士充庭賦
能識邦君此意無

聞詔下示兒姪

一封丹詔聘儒林
襖褐書生競拂衿
發憤正須先賈勇
莫教空望狀元心

焚黃誥

伶俜族緒不堪論
兄弟相持老僅存
方信有生同造化
君恩猶得賁丘園

徐氏幼婦以花獻几筵婦高甥也

前徐愛孝世相傳日薦珍嘗不計年便合一生成婦順
旅酬今始見初筵

近陋室以斗升釀家婦謂予未飲不以見告昨
夜偷兒入室挈二壺去自此室中又復索寞今
後酒熟便呼近隣痛飲遇夜守視庶大家着力
也呈諸兄兼簡士修思遠

斗米蒸炊入小罌未應消息到比隣靜思懷壁真成罪

恐是糟牀夜滴聲

寂寞茅齋晝掩扉著書還

原本缺

易招譏固知不解論奇

字惡客何須抱酒歸

吏部真堪上罰觥甕邊都不問公榮平明挈榼出門去

應笑童奴鼻息聲

再繼士修三絕

直造門來誠有意不持金去似全名端疑解習叔孫禮

竟酒曾無謹訟聲

一身何適非真盜淺識常虞世俗譏我欲似君專盜酒
常謀卜夜不謀歸

主獻賓酬卒舉觥禮成賓主不遺榮自慚館客殊無禮
終又不聞食器聲

兩小人相凌

負擔相隨語笑同不分強弱便相攻若無三尺齊民律
曠野何人是長雄

問訊東霞李師

烘林日動雲霞雜，繞坐香通蘭蕙分。
一局仙棋春院閉，不教聲利世間聞。

四月二十九日，迓伯氏時久渴得雨，田父交賀，而行客病之戲成二絕。

本是黃梅雨漲時，沙痕褪落不成泥。
龍公不費絲毫力，收起鳴車水滿畦。

盡是行人券內愁，鉤輶猿呌雜鵲鷗。
四時各有宜人處，只怕蕭蕭風雨秋。

投宿震澤僧難之翌日戲成以解

老將病骨犯煙波厭聽蓬牕雨作魔一枕僧房得安夢
受恩真是不須多

王亞之見訪知欲父郎中得女戲作

春風翦綠花開臉秋水為神玉作肌解使門闌添喜色
宜來何必是男兒

紅旆欲隨巖桂發丹書應與菊花期功名信是前庭事
浴了珠娘也未遲

前詩似不盡意別成二小詩

案前詩題云德茂晨起折花花枝中

眼上橫衝痛楚因詩戲之詩見七律

得意中人嫌太雅
眼胞上捧為多般
從今邂逅逢花處
要似茱萸子細看

已分都將命乞花
恩多成怨莫傷嗟
玉容紅淚猶堪憶
纖手拳頭儘好誇

五老峯

謹按詩二首其一
一首見五言律

小年那得此風流
老子登臨興未休
恨石尚分三敵國

仙翁合列五諸侯

遊龜峯

下徹靈根上太虛
斑分碧落照塵區
要知一覽龜峯境
不用重看鴈蕩圖

建炎八月乘家舟往來龜山

張侯無居寄岸上
志和有意學浮家
我今乘舟任來去
便應隨處為生涯

予寓家龜溪賦廩郡故事郡將始至及其將行

皆一奉謁予非異人也不敢異衆故自壬戌三
月至癸亥暮春計裁一年往來三宿何山寺退
而自笑復自憐也質明將發縱觀殿藏輿曲觀
慧樞二士經營成立之跡私有感焉因賦二絕
官供粥飯是官身一歲三逢陌上春應有得閒人笑我
苦因何事去來頻

房湑齋庖間翠鋪環山環水綠雲扶不知幾許中人產
支慧居前後阿樞

四面山田中獨出二並峯正如假山

黛色因依四面同田間獨並碧玲瓏
兩家茅舍依山住不在詩中在畫中

金山

突兀波心倚翠空他年金碧照魚龍
火燒水轉休惆悵且看中流樹蔭濃

登巖頂謁靖應祠

獨尋空翠到仙家夾路香傳數里花
欲快平生無礙眼

煙霞頂上看煙霞

弋陽道中題丫頭巖

昭君村裏千年恨神女峯前一夢成不謂此州無美艷

只嫌名字太麤生

吳楚之人謂
婢子為丫頭

鄭吏部開山路成二巖對碁於上因成二詩

向來本為買山田饒得青松不費錢更向青冥斲峰頂

放教南斗照臞仙

壽松
巖

碁局隨空破碧霄上方剝啄下方聞方圓變化知多少

笑殺先生洞裏雲

白雲洞

正月九日携兒姪遊寶慶寺

花川同色及春時不報人知也
自知此日不須題歲月
一回來作一篇詩

過龍居寺偶題寺有新取華嚴方結閣貯之

取意竹依牕密促自開花
照眼鮮明老僧踏遍諸方路
花竹相看世外情

千株松逐巖腰轉四面山如扇
掌開不厭客成真實否

華嚴閣就約重來

九月二十日遊桃源寺

東溪繚繞黃花國西崦縱橫白酒家誰道桃源解迷路
與君平步到煙霞

香爐寺

道邊遶廟占踈涼郊遠山連草樹荒果有祖師傳印在
為予試爇一爐香

題源師小房源善畫

吾心閒欲省塵緣選得閒雲起處眠筆下自多寬宇宙
眼前猶樂少林泉

謁龍潭

路不傾欹即易開若添人跡便塵埃神龍豈為含幽阻
只要紅塵不到來

煮泉石

頑石連卷裏綠苔人傳桑苧手親開誰言天地無情物
却解慙慙喚客來

題山庵

桃花櫻花紅雨零桑錢榆錢草色青
昌條脈脈煖烟路
膏壤輝輝寒食汀

題密庵壁

九月十日凌季文
約孔老人同游

西風吹徹菊花黃
喚我東籬泛一觴
白髮插花休笑我
年年汝亦負重陽

宿臨江院

鄱水僧猶敬故侯
為予解榻小淹留
病餘尚覺山川健

興在煙霞故未休

楚王廟

提封猶是古方隅
廟食何慚百世餘
醴酒不陳賓客去
至今遺俗重詩書

題趙侯廟

途窮道盡勢倉皇
猶守孤城結戰場
遺廟丹青照今古
不慚張許在睢陽

紫極二仙翁祠

徐神翁
張打魚

方內人過方外游兩翁身世等浮漚何如添作三高士
為有平生一水丘

廣孝寺

前朝締結梵王宮祕呪長因乞歲豐隆報自惟追廣孝
修除真可效臣忠

題演法觀

國雖褊小亦封除疏奉仙靈意氣餘猶有黃冠說前日
開元曾是下天書

遊梅竹

汗肩擔上碧參差
陽脈初興趣嫩移
山路莫辭行力遠
清風隨步不相離

圓通至樂亭見月戲留

潑黛長空月正濃
與師山路少從容
莫貪豪侈牛心炙
來看孤圓馬耳峰

題會蠡亭

舊說范子曾經此
山下故以名亭

禦兒南望越王城
相國勤勞幹國情
料得功成身去後

扁舟猶憶此經行

昔人寄賞事何如遠借高名信有無試使當時未身過
不知誰解別賢愚

趙康州徐節孝祠

康州義烈光千載徐老勤劬盡一身及到成名畧相等
須知忠孝是同倫

治廳

邦君臨治意何如所重川流政化敷堂上諸侯貴如許

高明他日見雄圖

題沈氏小橋

能去塵埃幾里遙
隨香步步透蘭橈
主人可是饒風月
分與游人倚小橋

再題棲賢橋

萬仞蒼崖走玉蚪
急催詩句已難酬
禪心不肯隨波浪
猶道橋流水不流

問花塢

一年春又轉頭空
前信花催後信風
花塢老人詩力健
好留春住莫匆匆

故市

頻陽田宅就荒墟
十室居人九室虛
驃騎將軍無甲第
書名竹帛又何如

樵牧無人記故侯
崎崎林壑水經邱
道傍若問王承福
應歎人間萬事休

樂平道中朱門當道詩二首

門外車輪日往還忙中塵土靜中間不栽松竹分遮帳
應要開門便見山

疇昔操戈列戰場人間無處避披攘門橫官道長安堵
端為無心害虎狼

尋趙安道舊居趙與予為昭武隔政交承窓前
種竹尚存壁間有題字丁寧主僧愛竹因以有
感

曾憶山城政在前人傳遺事總依然重逢蘭若棲遲處

只有窓前竹似賢

周家卜政幾專城曾見長身掩重名但願常教劉向在
不應異姓敢爭盟

催老泉鑿井

案題中稱老泉詩曰
全師二字必有一誤

全師何日鑿新泉澆滌塵埃是勝緣恐為師無均濟力
長招官索欠租錢

何叔遠置酒約遊後山值雨

偶因斗煖重寒候得見籠煙帶霧花却恨經春長閉戶

等閒風雨不離家

屋初立木過安仁見之約再過不果聊寄二詩
以見意

小築青冥不厭勞松拖紫翠竹牽梢仙郎不憶青綾被
辛苦江頭一把茅

浪泊空成兩鬢華要須收拾老生涯近聞洗足祇園社
菴外無人管落花

送龔清太尉上虞

射策楓庭正妙年一官聊作地行仙
雷門鳴處無枹鼓
勤勸春鋤種象田

陳粹中再約重陽之集既不果赴以詩寄之

酒熟招期勝士開錦溪詞伯是仙才
衰顏野老無酬對
若有新詩却寄來

九月南州菊未黃年年長待飽經霜
使君著意勤招客
催促籬間日夜忙

以詩問鋤父病

舍南舍北逢秋雨十日相望不出門聞自新涼罷湯熨
祇今含哺弄兒孫

病為世上真良藥佛是人間大道師十八師兄齊飽後
却言無病可醫治

閒門歲滿常驅迫事外那容免剥膚為問赤城香火客
不知還欠藥錢無

滿目溪山醉復醒虛懷長羨少經營相如病起忘消渴
一任沲江過錦城

不與紅塵費夢思
白雲流水有心期
吟君細與鷗盟句

病起全勝未病時

郎中近詩云淺沙細與鷗盟

再賦前韻

魯公世取龜蒙地
宜有田文出相門
恰似夷吾起江左
封胡羯末盡蘭孫

子美才高不自期
却言蘇李是吾師
若人欲逞蘭荂句
試掣鯨魚與對治

衛玠神清玉不如
非同杜乂鬪肌膚
十篇冰玉傳青史

便是神清得似無

高卧江濱百慮清獨於詩思尚營營
不勞刻楮三年力
攻破劉郎五字城

粉闌詞客伯牙子碧落老人鍾子期
幸有園林窮勝事
不妨鐘鼓樂清時

晁升道將還盱江先以二詩見意

濟世儒先道不貧
白袍古制搭烏巾
塵埃陌上無閒地
信是山林好著身

口說歸期為底忙春風九奏奉花王芳菲莫管前驅盡
末後慙慙最久長

偶同季文刑部訪仲成祕校因韻

獨自開門自看山旋添花草滿柴關不須竹院尋僧話
只訪先生亦自閒

問訊吉父

南北相望恨日踈經時不見意何如喜聞高閣扶衰杖
竹院秋光漸破除

身世兼忘了幻因飽聞塵網不關身病根未解依誰住
試向毘耶問主人

偃仆跳梁太自粗從渠窮技逞揶揄會須聞見都忘盡
看打虛空得住無

晚雨蕭蕭只傍簷此身無病亦凄然若人心在悲歡外
却是清涼八月天

費盡工夫意未親團藥說處是天真不堪兒女來看病
生怕龐翁不度人

前言在耳不應忘秋向南坡歷上方九日籬邊花未透
中秋雨霽月新涼

聞秀實歸自臨安有新作戲以小詩寄之

永豐西角綠絲垂盡日無人可得知聞道梨園採新曲
長安十樣畫宮眉

宮粧十樣向眉頭傳道人間不解愁說與眉端向人意
元和才子舊風流

才子風流是當家曾傳舊語到天涯文章爛漫鋪紅錦

合向天邊弄彩霞

天邊五色彩霞新筆下應無筆外塵一曲奏時天一笑
光搖柳宿萬枝春

和寄錢稷臣

稷臣自謂
遇呂公

澹泊因緣亦破除風情心緒尚貪書越山不作功名債
硬忍飢寒計不踈

白酒東家一飯餘仙翁題字石榴書知君招飲先歌曲
莫道神仙世味踈

寄徐明叔郎中

雪釀寒凝凍結醅獨謠興懶自持杯聊憑書詰徐居士
許折梅花不寄來

上畝父郎中

堂前雙石瞻金印砌下孤峯記好詩春入甕醅誇翹蘂
雪浮盞面壓槍旗

湘江又見承明客青嶂誰刊嶽麓詩雙旆到時鴻鴈少
洞庭春水照旌旗

大明老僧年七十五日誦法華一部

自憐雙目眯塵沙老欲依僧半在家世上何人銷永日
如君七軸妙蓮華

閒閒公為上清宮道士寫經并以所養鵝羣付
之諸公有詩某亦同作

會稽筆法老無塵今代閒閒是後身只有愛鵝緣已盡
舉羣還付向來人

憶送雙鵝懷玉作長生鵝

不費黃庭一卷經
經年門外戲波輕
慙慙送上孤峰頂
去伴天鵝雲外行

別雙鵝

綠水波浮雪羽光
只今便住白雲鄉
爭前故眼如相戀
莫是空高少稻梁

贈筆工周宣

靜聞孤卓漏聲遲
午轉花陰晝景移
能事莫憂身不足
人間不用石榴皮

吳使君

玉皇案吏去紛紛
舟到三山有幾人
西掖文章推獨步
早歸丹陛演經綸

化僧求詩往宣城

草鞋踏破世間塵
乞飯因緣不為身
一路春風好消息
不知此事付何人

僧求詩往平江

一瓶一鉢遠山寒
野路梅花已向殘
自古吳門十萬戶

莫疑開口告人難

送鄉僧證緣歸山陽

千家名滿百家村
細說淮南欲斷冤
師到鄉關勤問訊
古人今有幾人存

贈解院主僧

平生老信愛顛狂
覺子而今繼道場
坐斷前溪去來路
為誰辛苦為誰忙

下雲居至瑤田戲贈圓老

山在雲中人在山人居山與白雲間也須認得瑤田路
方見青雲一望間

戲伸監院伸宣力甚勤圓老有傳衣之意

安樂窩前安樂僧一輪明月一枯藤與他整頓山林了
更上孤峯第一層

贈宣上人二首

四明昌
國人

海上孤峯一劍鉞從來匣裏自韜光如今直面相呈處
懷玉山頭春草長

袖被騰騰粥飯師無人曾見下山時相逢只道無能解
肯作紅樓應制詩

贈棲賢僧二首

錦心繡口絕鉛華白艷銅餅古梵家宴坐無人問消息
有時敲板喚玄沙

暖風吹律百花新何處芳菲不動人到底雄丹有家法
風流不是一般春

老僧年八十五誦經度僧今五十八年一室脩

然日誦法華數過因題壁間

事隨過眼塵常靜愁不關心夢更清八十五年香火社
殘經七卷席平生

酬伯氏再用前韻

按題云再用前韻
今集中七絕無之

自方國小難回袖不畏秦彊欲奏盆遙想調琴堂上日
仁風曾使滿千門

和賦秋聲

初傳巖谷聲猶靜乍轉松篁韻更清莫遣幽人破幽夢

夢中榮辱一般輕

次韻曾吉父食酥

色分姑射冰肌外
味在金僊露掌中
乞與佳人潤粧臉
兩家春色一般風

聞道金城煮醖醢
貢包長伴雨兒梨
即今萬里風流在
浙水東頭又浙西

和曾吉父以詩謝鄭顧道送酒

文人運化得天然
九醞香醪自日邊
分與詩人澆舌本

不妨石澗一杯泉

南浦紅蕖色欲然
北山僧枕夢無邊
醉鄉境界無南北
不用移封向酒泉

和魯吉父求梅于鎡父二章

沙觜冰消水上波
春風初不奈梅何
雪中猶恐迷真色
殘雪如今得似麼

春入茶山夢未回
閒情獨愛一枝梅
團圞要共鄰僧借
不怕銅餅帶月來

和吉父韻謝徂父煮菜

雲海堂前飯鼓忙頭陀巖下客船香長因筍蕨甜如蜜
引得遊山潘孟陽

手把長鑱斲白雲無苗黃獨不勝珍賜香堂上春風在
謝爾淳山識故人

次魯徂父韻

白玉堂中晝漏遲小姑新學竹枝詞中郎筆力高千丈
不稱詩情不作詩

鳳尾花牋白鳳新
元和才子賦陽春
茶山居士貪禪寂
悞却江頭解佩人

和曾懿父庚伏書懷

垣衣侵砌竹穿牆
日日蕭條氣運涼
急雨滿池鳴兩部
幽竒不獨水雲鄉

吳興水郭芰荷隄
別後扁舟去岸迷
莫訝道人新活計
亦看粉面照清溪

綠漪平漲小橋頭
紅蓼花鮮杜若洲
便喚畫師來貌取

不須雲夢澤南州

仙翁服食久遺年且作童兒戲眼前井上輓轡休軋軋
簷間風露自濺濺

皇家休符徹象緯河上五老飛人間即今三老不住世
賴有兩峯高玉山

申郎句法祖師意取玉鑿山開混沌踈簾清簾半雲雨
卧聽天籟生虛涼

和絃父樓字

共醉元龍百尺樓方知塵世已高秋舉頭把酒問明月
許我乘風歸去不

和曾砮父約八月十六日看月

海上羣仙錦旋欄舞餘擲出紫金盤人心自愛休分別
未必全輸昨夜看

以酒餉砮父蒙以絕句為謝因次韻并叙送行
之意時欲往吳中

旋圻金泥不滿杯明知不自酒泉來後房綵女弓鞋窄

持得金蓮案上開

詩滿花牋酒滿杯
吳中應喜使君來
馬蹄歸踏青霜滑
早趁江梅次第開

和龔父分洞庭柑

林屋仙丹色外妍
清泉香霧總堪憐
不知自落人間後
三寸黃金直幾錢

秀實監丞復寄二篇
譏商彥不至亦微見及因

次韻酬謝

案此詩二首
其一見七律

東岡準擬太丘來竹洗塵根石拂苔好客風廊俱有分
只愁高唱不容陪

秀實寄兩絕來招嘉彥嘉彥未回輒次韻

舊喜三周貪好客爭如一叟促歸程長亭日晚相望處
一片平湖冷浸星

長道相思苦不開故從百里泛舟來如何不見稽山老
却道心因興盡回

和張直可投詩

老覺浮雲念不萌
君才豈合後諸生
從教罪我春秋法
不受詩人月旦評

聲猶在耳鳥關關
過眼庭陰作午班
香篆靜中便細看
綠蘿新處得高攀

富平學滿書三篋
輔嗣功成易六爻
聞說短檠書細字
不須燈火入涼郊

塵音解作障耳霧
佳客能開病眼明
一軸收藏比珍貺
不妨擲地亦金聲

牛衣泣卧傷君子華袞高名亦丈夫但使如雲雙翼在
它年九萬是鵬圖

小試成均書一封女媧五采不言功青雲事業期它日
觴豆規模是小忠

潤入圖書麥向辰如今此腹又孤人餘風更與留春在
時照紅英作醉裀

誤身人道是儒冠穩稱圓冠我媿難顏歎起居皆富貴
惠施文字獨芝蘭

楚楚才名六尺身此間襟度有殊珍
餅無餘粟難論富篋有風光不似貧

老去獨憐南澗竹閒來不費北山移
年顏攻我真無賴富貴尋君好自持

戲和虞卿

君有輕舸恰稱身我家亦有嶺頭雲
君雲容易能分我亦有吾雲可寄君

和張平甫韻

寒谷由來不識春可憐金殿解宮軒
哀王孫有秋來月幾處愁人不掩門

和卓季萬寄示五絕宋德操為唱

一百五十節欲近二十四番風
老時莫因舊雨與新雨間却十枝并五枝

靜無餘事可關情快讀新詩醉魄醒
太守文章真袞袞參軍衫鬢兩青青

失計長松習用剛一官纔得鬢毛蒼
酒醪不入餅空腹

始信鴟夷智慮長

此篇戲宋糾

南國餘寒有素期
年年隆臘只浮澌
還人春色九十日
紅紫從它少後時

紅旆朝天綵色新
主人心在五湖春
君王不鑄良金象
莫愛扁舟共載人

和子楚

黃梁未熟任推移
堪笑年年一局棋
說與山中老居士
從今櫻筍歲相期

我知黃卷能遮眼
豈識紅襦解對碁
且要此心無黑白
憐渠勝負自相期

和張文彥所寄二絕

家有千章教子經
言無一字不堪行
有人志業堅如此
那不流傳世上名

一枝一枝復一枝
造物捷敏功不遲
驥子熊兒誰得似
它年看誦少陵詩

和曾吉父酬鄭顧道韻

古澗久無軒冕夢茶山參遍古今詩江湖風月閒天地
不愛牙旗愛酒旗

和王仲高遺丁求安二詩

光祿文章寄小詩愛閒不是傲當時扁舟時過西溪曲
端為平居有所思

未扣玄關隱士居曾尋舊繡理天吳自從拭目來冰鑑
悔為兒啼拆海圖

裴子再寄詩酬之

裴郎四海一輕舸身寄浮家小動搖蝴蝶不來閒處舞
知隨春夢到雲霄

次鄭丈韻又一小詩代簡

籬間殘菊舊令尹霜後古栢巖諸侯梅花若不報春信
誰表東風第一流

溪山堂上有約束要待春日同暄妍小梅恃愛犯顏色
獨洗粉面當老拳

徐思遠招客

盍簪何啻得明龜
醉裏呼曹自啟扉
我保劉腸正藏六
到將無處得同歸

徐思遠趙大猷寄梅以詩謝之次韻

芳菲本自競年華
人老空將命乞花
分比鴈行長作客

盡饒蜂煖似還家

和思遠

蒲團紙帳老生涯
只看新詩勝看花
遙解知君得詩處

竹籬茅舍兩三家

和大猷

以假蠶豆豉送鄭顧道

黃巖貢篚魚俎赤浮玉僧盤豆醬寒走送似呈花下客
看花容易別花難

以豆豉送馭父

吳楚家山一水分金山僧飯飽知聞蓴絲煮菜無消息
鹽豉聊供舊使君

以紙衾寄叔飛代簡

我有江南素繭衣中宵造化解潛移隆冬必可獨不死
分向茗溪雪閣時

苦寒得酒

因雪成寒勢未收及時一醉比封侯
陽功亭毒無人見已有春光亦信不

鯢鵬蜩鷃子知不小大形殊各有儔
取醉盡情師李白放言極力問莊周

雨中以一壺酒送汪養真秀才

南枝未肯試瑤英客枕愁聞屋瓦鳴
路斷往來泥滑滑相思聊寄一壺情

以芋易酒于應求

崕田到死無饑苦軟飽三杯醒又饑我忍空腸謀換酒
為嫌惶恨沒休時

以麵換祖孝酒

雪壓寒根麥未黃春催社籩麴初香若論本是同根物
好遣枕榔喚索郎

并寄季文以酒

案此題上
似有脫句

溪漲蒲萄新撥醅興添野水入金杯華嚴居士貪幽定

一線春絲喚起來

再用前韻酬明叔寄梅并酒

絳蠟融春扇欲開恐君池閣獨傳杯故將曼語招新句
望外春風作伴來

梅

凍思嚼蘂嗅寒芳隔月春非道路長作意開籬通野岸
等閒尋步到池塘

自縣圃得梅花因成五絕

天工施春不愛惜樂與枯槎借顏色
歲寒日晚律候嚴
已遣南枝報消息

歲歲新花即舊花生緣感舊自興嗟
先春莫憚傳消息
催促東君早轉車

春風欲轉非容易選取一枝作先使
試看欲發未發時
似與東君說心事

我家阿大才名久老筆能旋萬斛舟
竹外試題清淺句
莫教何遜獨風流

元酒初傳習駿奔鹽梅異用合先論須留鐵面攀墀力
莫為花開空斷魂

以前韻再繼五絕

夜發前村君莫惜曉與天花比真色爭先不是壓羣芳
祇恐羣芳心自息

老眼非慳不愛花慣逢開謝不須嗟君看桃李成陰後
也自能迴長者車

風流比擬談何易未省爾曹堪作吏曾聞一頌了劉伶

湖上七篇傳盛事

紅紫紛紛難共席
芝蘭冉冉或同舟
洛陽花譜今存否
借問誰居第一流

春風待看百花奔
舊事知誰可共論
顏色不曾追俗好
從他蜂蝶自勞魂

和向監廟紅梅

向來冰艷敵寒空
直待春來試淺紅
大抵一般標格在
兩般顏色不須同

已為春風一醉來不知粧鏡為誰開
處妃只解如飄雪也費陳王八斗才

南人誤種桃李欄北人疑作杏花看
更須結子成佳實留到清和伴牡丹

再賦紅梅

比玉比冰俱未切恰是紅兒兼比雪
東君主掌不堅牢也作堪憐也堪折

鄭顧道惠臘梅

一種佳名兩字猜
蜜脾融液臘中開
雪花不敢迷真色
風格都緣不是梅

長垂月帔別天堦
翦作金鐘應律灰
世上語言無入處
好從天上覓詩來

和賦千葉桃花

騶玉團香移寶綃
凌風浥露勢驚飄
從教不結千年實

且看尊前一味嬌

一云若教解結千年實
金屋何緣貯阿嬌

纔喜尋春又惜春
尋春眉展惜春頻
莫將頻笑為花用

處處平蕪是醉裀

鄰僧送桃花

性根本自白環宮分得天邊一種紅
比似將花供金粟
何如乞米送盧仝

攜稚幼看桃花

人面看花花笑人春風吹絮絮催春
韶華雖好多頭緒
何似秋空不受塵

賞瑞香催海棠

鄭人蘭佩不須誇自別團香擅國華客枕莫疑無好夢
年年同有瑞香花

生無飛領老蒿萊慚愧君侯客燕開面帶淒涼無酒色
誰人信道賞花來

魯國諸儒走月題甘於聖學飽羹藜不知荷篠人歸後
誰似張侯為割雞

刺繡牕前午夢驚驪駒堂上禮初成旁無粉黛燈籠錦
頓解飢寒瓠子羹

卜畫彌文卜夜遲前人明訓後人師海棠不守春秋法
高燭偏宜照睡時

和吉父賦海棠

畫手三川著色濃黃昏更在獨園中佳期落日連雲合
艷采垂絲帶縷紅

我愧留髭花惱客君矜止廣尉貧公傳呼徑去孤風景
幸好看時不暫同

斫竹移松傍淺樊牡丹時節尚輕寒向家庭院花如錦

獨為窮忙未得看

題范子濟雙頭芍藥

春風隨律入花房三月淮南春晝長聞道傳呼催近侍

雙垂羅袖引花王

趙家姊妹在椒房宮漏春遲午夢長淡拂蛾眉減脂粉
一般裝束奉君王

紅蓮

池塘雨漲暑風微弄水紅粧出水遲五日便當分六月

韶村道上見開時

題前寺中洲茶

中洲絕品舊聞名
瀾以寒泉雪乳輕
怪得道人長不睡
一甌喚醒夢魂清

隣園花成欲具旬會病未果二首

嬌春意謂已堅牢
次第千林散錦袍
恐有天魔妬妍好
遽連風雨作龐豪

年從脹脈冷侵肌
強欲尋春怯自疑
衰病固知無可奈

不須妨我看花時

明日沈幹送花二枝續一章


暖風吹得也輕狂
連夜爭開有底忙
困恨蘭宵留宿酒
笑濡曉露試新粧

問松

歲晚孤松輒自娛
排行金朶映蒼鬚
不知風雨摧殘後
曾有心情管領無

逢伯氏舊鶴代賦

引啄苔池浴素翎
野田人遠見精神
羽翰未到青霄路
料汝猶能憶故人



欽定四庫全書

集部

東牟集卷八

詳校官左中允

臣

瑯五珠

主事臣呂雲棟覆勘

謄錄貢生臣程廷璋

繕錄監生臣嚴續曾

欽定四庫全書

東牟集卷七

宋 王洋 撰

制誥上

二廟封夫人制

神有功於民既受封爵而儼神作配者可不錫以美號
共膺廟食乎且某神妻英靈之跡載于祀典凡邑祈禱
影響感通既耦像以享乎一方宜䟽恩以昭其異數秩
以二字貴之小君尚期杳冥歆此嘉寵

巫伋進講尚書制

具官某講筵高三侍之選藏壁出四代之書堯舜之治
垂衣裳亶其稽古文武之政在方冊可以驗今顧惟儒
宗宜備畫訪以爾多見守約資深逢源憲臺持糾察之
公諫省有彌縫之益入侍經幄詳聞起辭諒學術之該
通尤典謨之淹貫於五十八篇之定舉大義以敷陳若
十餘萬言之繁鑒空文之無補庶裨聖治日佇英猷

余堯弼兼崇政殿說書進講左氏傳制

具官某朕鑒古成憲求時多聞詳延鴻博之儒密輔緝
熙之學疇咨在列慎簡其人以爾羣書淹該衆士宗仰
著曲臺勾稽之譽肅副端彈糾之威望實具孚風采彌
邵廼眷素臣之傳深明約史之經有五體之可推於三
家而最備爾其發揮雅蘊進陪帷幄之英辯析異端力
救膏肓之訕期有裨於至治庶無事於空言

成閔轉觀察使制

閩山多阻粵嶠旁連盜弄潢池之兵時煩羽林之遣靈

旗一出蒲澤掃清具官某抵掌功名塞旗果毅受命問
罪釋脅從而殲渠魁振旅凱還歸飲至以數軍實爰頒
寵典用陟廉車往祇恩光益厲忠勇

許世安除觀察使制

屬橐鞬而密侍時謂信臣稽歲月以疇勞宜頒寵典具
官某受資沈勇許國精忠安邊而立功名牧馬而在垆
野入居左右久宣文陛之勤時既終更用陟廉車之秩
往祇異數益勵壯圖

除大理評事制

大理刑獄之原卿貳摠其綱丞正聽其成而言議根本則始於廷評非通律令達民情者莫克在此爾等明習三尺法試于有司咸中科目肆用推擇往叅棘寺之屬務悉厥心各揚廼職

詹公薦湖北常平茶鹽制

具官某操煮摘之利以佐經費擅斂散之權以稱低昂合茲二使之華付以一方之畧委寄至重推擇尤艱以

爾早議禮於奉常繼乘輅於右廣乃眷重湖之壯揔于
列郡之饒財用之餘不足得以周知官吏之賢不肖得
以偏察往任外臺之責勉勤振職之恩祇予訓言用荅
光寵

黃仁榮浙西提鹽秦昌時浙東提鹽劉伯英湖
南提鹽並兼常平制

山海天地之藏資用度以無窮開闔斂散之權欲低昂
而適稱委以重寄慎於擇人爾等才力強明識度闔達

咸有績用稔于朕聞顧茲二浙之間與夫重湖之右有
鬻摘之利足以佐國有帑廩之積足以裕民各專使指
之將往思職守之責務澄清於一道兼總覈於兩司其
懋美庸以副華遣

余賓興太府寺主簿制

具官某食貨出納各在外府簿書勾稽務於得人以爾
才資甚高事任彌著以字民則有豈弟之譽以守藏則
有彊明之稱肆疇廼勞往踐厥次宜精詳於凡目勉圖

報於恩休

史才國子監主簿制

橋門師表之官簿領勾稽之任叅決監事慎擇時髦命爾往居是為清選勉思厥職用荅所蒙

錢雲騷授官制

朕廣闢道山博搜逸典而爾以家藏之富悉上送官爵秩之榮所宜錫寵往欽嘉獎益勵操修

鄭僑年江東運判趙令諤福建運判范寅秩湖

南轉運判官制

具官某等大江之東重湖之右皆總賦租於九郡復專
刺舉於列城如閩部之崎嶇艱漕臣之飛輓擇茲數路之
寄同以安民為先爾等試績可觀治稱咸著徹于聞聽
付以將輸攬重任於外臺宜究心於一道劉晏之知取
予蘇章之明公私無俾前人得為專美往祇明訓各勵
良圖

史聿潼川府路轉運判官制

具官某一萬里坤維之遠重委寄於外臺十五州梓路之饒擇將輸於漕計以爾材華自奮政術甚優安居臨邛之民皆資撫字南充金水之郡並茂藩宣眷惟劔川之東上直參宿之度去此端朝之邈統於所部之繁豈惟轉餉以足國裕民蓋當刺舉而揚清激濁不輕責任往勵猷為

郎官制

文昌之總衆務周官之分四司詳明莫重於議刑參贊

尤難於厥屬以爾稟資勤慎臨事疏通繼承正于理廷
有平反之課績擢從棘路列寘蘭闡顧天下奏獻之繁
與律書重輕之意往佐而長參酌其宜毋或不欽思所
責任

蔡絳太常博士制

具官某曲臺典司禮樂設屬叅預討論自非通儒不副
華選以爾志尚自立詞彩蔚瞻起從玉律判定之所往
踐厥次汝能傳經質義折衷是否俾時典章侔古不盤

迺揚汝職懋哉

王瑤除閤門祇候免供職制

具官某朕以中閤之戚屬綴上閤之班聯所以示恩也
命爾而不責以職尤為異寵其思懋勉以稱所蒙

裴良琮轉秉義郎除閤門祇候制

具官某朕以東朝之戚屬綴上閤之班聯庸示眷恩俾嫻
儀矩往當祇肅思副寵嘉

大禮都虞候換給定本制

具官某朕以大報禮成均登海寓矧爾執戈之士可無進秩之榮其祇寵光益勵忠績

士瑄磨勘制

具官某朕惇九族以廣恩免從吏責必十年而進秩用率國常爾宗姓之英材資之美屬司稽籍歲考應遷其繇環衛之聯俾進遙團之任其思謙恭以副寵光

畢良史直敷文閣再任制

具官某朕睦鄰固圉擇守撫民惟已試之績可觀則疇

勞之恩宜厚以爾職稱博洽材擅敏彊自臨鎮於盱眙
能緝綏於淮服教條素著聲望久孚與其求代於終更
曷若責成於因任爰陞華於內閣用增重於邊城勉為
朕留益宣爾力

鄭益換官制

具官某朕不吝爵賞以旌戰多而爾效命行間列員虞
事稽之曩式秩以美階往祇官榮益盡忠力

韋訢換文官制

具官某朕躬郊拜貺浹均休凡居官守之隆皆懋賞
延之渥矧吾元舅亞秩公台顧其嗣子之賢宜易文階
之品雖循彝典蓋出異恩益勵操修以圖報稱

任元等換官制

具官某朕賞恐踰時付便宜於帥閫功圖實效嚴考覈
於吏銓茲命為真益恩報稱

橫行換官制

朕賞恐踰時付便宜於帥閫功圖實效嚴考覈於吏銓

事廼率常爵無濫與具官某臨戎果毅勵志精忠援枹鼓則忘身執干戈而衛社戰多累著命秩從權茲稽選部之文用正遙團之秩往祇渥典益懋壯猷

李吉等為有戰功換官制

勅具官某吏士乘邊朕所優卹矧有功效法當序遷可

姚舜明復一官制

勅遇災而懼修德所以應天強恕而行推恩期乎及物既下再新之澤宜原一眚之辜眷予近臣可忘褒叙具

官某氣專以靜行正而和蹈履艱難久著輿人之誦講
調師旅居多長者之言昔大敵之深侵本嬰城而固拒
民知務戰方圖魏尚之功力已不支難罪常山之守既
陞榮於華貫復牽叙於崇階聊示徽章用增命數奪伯
氏之駢邑在朕何心取甘茂之十官於汝無愧益祇明
命嗣有寵光可

林安上復直龍圖閣制

勅具官某爾文學之富為時老成政事之優見於已試

自陪從列譽重本朝屬時艱虞靡究施設嘗稍從於貶
爵蓋自致於煩言屢沐殊休宜還舊服名已陞於延閣
祿尚寄於真祠勿替忠嘉嗣有褒寵可

呂源復直龍圖閣制

勅具官某爾濟世之美為時名家臨政之優所至稱治
殆游更於煩使何屢致於謗書蓋嘗統三千之師曾無
發一矢之用稍從貶黜既易歲時念將邁於遠猷盍稍
還於舊物升華奎閣增賁星輅其上體於眷求益自期

於報稱可

葉煥復集英殿修撰制

勅具官某推恩宥罪務通四海之心含垢匿瑕是謂大
君之度矧守藩之良翰有持橐之舊臣原其一眚之辜
豈宜終棄需此再新之澤用錫鴻休庶均蕩於仁風冀
共迎於善氣以爾蚤修文藝旋事試功出領州符鬱為
共治之最入參法從卓然進說之優嘗偶致於煩言俾
暫鑄於要職既淹歲月宜有甄收升秘殿之崇名假宣

垣之偉望昔周勃有重厚之器卒安邦家張敞被輕嬖之名不至師傅汝惟謹擇何媿古人可

胡舜陟復集英殿修撰制

勅具官某朕惟遇災而懼修德所以應天強恕而行推恩期乎及物矧茲壽俊時惟舊臣原其一眚之辜豈宜終棄需此再新之澤用錫鴻休庶均蕩於仁風冀共迎於善氣以爾早緣才譽寢更要途入貳憲臺執剛果不回之操外分閭服有從容治辦之稱跡其蹈履於艱難

知乃始終之勉勵殆未究其成績用稍致於人言既淹
歲時盍申優叙西清要職昔嘗褫於崇朝秘殿榮名今
匪頒於三錫惟功罪之必正見予奪之無心其體恩章
益思奮用可

李璆復集英殿修撰制

勅具官某大君之度貴在匿瑕有國之患莫如宥過思
仰符於駿命肆大賚於多方眷予舊臣可忘申叙爾質
行素美術業甚優早以藝文遂登禁從往從貶黜遂歷

歲時其躋祕殿之聯仍卽真祠之奉念人言之可畏汝
勉自修承帝命而莫違予惟好德勿煩多訓益邁遠猷
可

趙子崧復集英殿修撰制

勅具官某

同上

爾質行之美著乎夙聞術業之優見于已試

自登要路益顯令猷河間大雅之風本由天性東平為
善之樂蓋自安行往遭寇攘有矢綏御一從貶黜遂歷
歲時其躋祕閣之榮仍卽真祠之奉可

衛仲達祕閣修撰制

勅具官某

同上

爾質行素美術業甚優早以藝文遂登禁

從及事功之累試在名位為已隆殆覩時危率先干紀
念一從於貶黜既屢沐於恩休其升中秘之聯仍即真
祠之奉可

朝散郎直龍圖閣程昌禹復朝請郎制

勅具官某兵興已來人懷自謀其有奮不顧身以徇國
家之急者雖有小過固當宥之以勸能者爾前自淮蔡

徙于荆湖皆履涉艱危以身犯難斯亦勤矣比因赦宥
進叙舊階而有司謂爾尚在譴呵法未當得特從寬典
用視疏恩夫極塗炭之民行勞徕之政因時施設固所
敢為然能不尚威名毋急功利則謗書滿篋亦何畏哉
其既乃心勿替朕訓可

何志同復徽猷閣待制制

勅具官某爾質行之美著於夙聞術業之優見於已試
自登要路益顯令猷多雍容長者之風具禮樂成人之

事念不見於三年之後常佇予懷想致意於一篇之中
可明汝志尚即真祠之奉言歸次對之班益保令名永
綏後祉可

季陵復徽猷閣待制制

勅大君之度貴在匿瑕有國之恩莫如宥過思仰符於
駿命肆大賚於多方眷茲近臣可忘申叙具官某恭和
而能斷質厚而有文列服儒官見推多士致身法從名
重本朝前膺舊德之求實謹佐時之選宜敷誠意用副

虛懷乃遽致於煩言謂有同於誤國一從貶削屢易歲時既均被於洪休盍稍還於舊物姑即祠庭之奉言歸次對之班益自奮於忠嘉其勿忘於協濟可

鄭望之復徽猷閣待制制

勅上同具官某柔以有力直而好謀臨難不回惟祇厥事所居見紀克世其家曩從散秩之卑進貳銓曹之貴殆有同於特起蓋以表其異材覲竭嘉謀共康庶務及覲夫艱難而避事烏在乎顛沛以愛君俾即真祠仍鑄要

職念屢更於歲籥宜稍叙於官聯言陞延閣之華益對
茂時之寵其思論報勿替疏恩可

趙子直復徽猷閣待制制

勅上具官某詩傳古錦學富巾箱不羣之材出乎天性
為善之樂見乎安行昔漢家規磐石之安大封同姓若
周室重維城之寄亦以宗強豈曰異時弗圖前烈矧治
功存乎已試而譽望得於舊聞雖尚寄於真祠宜遂躋
於華貫益思奮勵嗣有寵光可

張擴致仕復敷文閣待制制

懇据禮經力抗辭榮之奏閔勞官職爰疏歸寵之恩眷
顧舊臣申頒渥典具官某才資雅健德性粹溫頃擢自
於郡麾亟躋榮於郎省演綸詞掖時稱潤色之工持橐
從班日罄論思之益方即真祠之秩偶聞美疾之嬰勉
徇情於奉身用陞華於次對往祗邦渙增耀家居

端明殿學士左通議大夫提舉萬壽觀許翰復

資政殿學士制

勅朕遇灾而懼未明求衣推原其端罔燭厥理肆加需
澤大賚多方雖極幽微靡有遐棄而况二三大臣散在
外服蓋朕所恃以為時望者也使或失職斯民何觀宜
錫恩章悉加命數具官某識高而器遠學博而聞多清
以有容澹乎自守剛而不犯意在愛君譽已高於一時
志獨追於千古昔靖康之初政起宣和之舊臣首預優
除旋登要路遂從憲府進陟樞庭士心僊望其謀猷天
下想聞其風采宜重持以自愛何輕譽以假人功雖勒

於燕然豈無慚德人既殊於有道寧免愧辭榮名因禡
於殿廬賦祿乃從於祠宇屢更歲月亦既甄收顧惟求
舊之恩可緩再新之澤殆將應於同德宜先正其崇階
不替前恩用旌宿望其勿忘於奮用尚共濟於艱難可
端明殿學士左大中大夫提舉成都府玉局觀
馮澥復資政殿學士制

勅

同上

具官某智窮閭域識造淵微凜然君子之容富有
昔人之學方議臣之進說挾邊將以開功萬口一辭不

期而合獨抗在庭之論允惟特立之賢豐跡既彰名言
具著知夙沙之塞隧蓋辱國師謂承璀之撫軍徒張賊
勢凶德既從於顯戮吉人宜得以彙征遂冠樞庭實叅
政柄迨國家倉卒之際乃志士有為之時豈前智而後
愚何始勤而終怠無惑乎人言之屢至當念乎已力之
弗支念祖宗崇宥過之仁而憲典開自新之路豈於舊
弼反緩疏恩位已叙於故聯名復陞於祕殿鄉居既佚
仍從玉局之遊國步方艱應有日邊之夢尚惟耆德勿

替成言可

端明殿學士左光祿大夫提舉鳳翔府上清太
平宮宇文粹中復資政殿學士制

勅同具官某智窮奧域識造淵微溫然君子之容自得

先王之學剛而不犯縱橫皆本於愛君清以有容造次
不忘乎自守初從蜀土來至上都聲譽藹藹如固已先於
多士文章卓爾寧復慕於古人旋賜對於大庭果陞華
於前列蘭臺詞掖歷踐要途畫省鑒坡幾更歲籥比參

機務之際適丁多故之時艱難可見於同心夷險不聞
於異論嗟國忠懷自謀之計卒蹈危機惟見素存憂國
之心終逃衆禍及出分於閭服恃作屏於要藩諒方憂
於虎狼固不虞於蜂蠆再剖符而均逸屢膺需以圖新
稍易崇名初仍舊貫念四郊多壘之難莫若今朝成羣
材並進之功豈無異日尚益堅于汝志用勿替于我家
可

左中大夫提舉西京崇福宮張徵復端明殿學

士制

勅朕遇灾而懼未明求衣推原其端罔燭厥理肆加霈澤大賚多方雖極幽微靡有遐棄而况二三大臣散在外服蓋朕所恃以為時望者也使或失職斯民何觀宜錫恩章悉加命數具官某識高器遠學博聞多言語足以竦動羣情政事足以緝熙庶務烏臺正色已稱疾惡之如仇螭陞記言自信直辭之寧辱自將使指進直詞垣偉抗節之堅剛嘉訓詞之溫厚會新田之方啟嗟舊

弼之寡謀執法不回諒汝丹衷之志去姦務速具存白
簡之辭固允協於師言亦大同於予志爰超從列遂贊
機衡出入累年備著忠勤之效始終一節曾無險易之
殊蓋惟本朝之光甚協當時之望迨一麾而出守據九
江之要衝休戚固同中外奚間猥煩言之屢至謂舊青
之難逃遽解真符遂從貶爵俾下睽於中祕仍分務於
留司既積歲時累更優叙茲下再新之澤豈忘求舊之
思用還直於殿廬尚均休於祠宇永懷共濟期底丕平

可

趙岍復直秘閣制

勅具官某爾世濟之美為時名家臨政之優所至稱治
前帥烏合之衆會當蟻聚之師念久習於安平諒不虞
於倉卒官投散秩職褫崇階已歷歲時屢膺霈澤盍稍還
於舊服俾尚寄於真祠其念寵光益思報稱可

張士廉叙官制

持軍臨陣罪莫大於遷延積歲省愆恩亦昭於拂拭具

官某頃繇勇畧擢任戎行冠至失掎角之方敵奔無追
躡之效辟從吏議名在刑書既閱日以滋多宜推仁而
更始悉還舊秩益勵新謀往當終身思鑒前轍

劉光輔叙官制

具官某朕躬郊拜貺浹惠恩凡在譴呵悉皆甄叙以
爾頃繇臧獲從坐悔尤辟難吏議之逃名遂刑書之絳
屬當肆青庸昭曠蕩之仁是用叅稽稍還品秩之舊服
茲至宥尚念自懲

蔣璨叙官制

具官某決獄以麟經之義明大夫遂事之辜補過稽義
易之文取君子宥罪之象爾頃任牧養弗思靖共以擅
收庫息而免官以侵用廩粟而鑄級雖經肆眚尚貶一
階既久閱於再期宜盡還於故秩往祇寬典益念自懲

王贊叙官制

具官某朕明罰以懲過舉疏恩以許自新爾頃麗刑章
再更箴用從甄典盡復故官往體寬條毋忘檢已

向子志叙官制

具官某朕明罰而欲其當罪示法之公宥過而許其自
新待人之恕爾頃從吏議遂絳刑書既閱歲時之多宜
還官秩之舊往祇渙渥毋怠省循

吳懋叙一官制

勅具官某朕念斯民離散之後當宁慨嘆檢身節用不忍
以一毫取于民庶幾力行以致仁壽郡二千石固宜仰觀
朕意布宣德澤以成厚下之政其或過計以謀足國豈朕

意哉爾在四明綏養疲瘵愛利之實亦既行矣而言者謂爾藉府庫之餘供扉屨之乏財匪由於天降民不可以戶曉則前日之譴固亦不可不行今者己更歲時再膺恩霈而大農舉邦籍計之實縣官所藏汝初不敢私也進叙一官稍還舊物汝之疑罰行自著明益既乃心以俟褒選可王倫特轉朝奉大夫除右文殿修撰主管萬壽觀詒

勅具官某朕惟古者交戰之國雖兵刃相接而攝飲獻

禽之使往來其間故得以分曲直定強弱宣導怒氣化
為和平此古人所以貴於使者也爾昔以氣節自信將
命出疆去國五年斯亦勤矣今其來歸不失使指庶幾
平國以靖吾民官爵利祿非所愛者昔西漢之世賞功
太輕故蘇武還朝位止屬國後世議者固多惜之朕今
待汝有加于前則汝之思報尚其勉之可

石邦哲大理寺丞制

具官某朕嘗取曹劌必情之言訓飭憲臣固期天下共

卷之二
體至意況大理刑獄之總凡命官屬必加審擇爾評議
廷中以詳慎聞肆庸叙遷往丞寺事其益既厥心思厥
職毋或枉濫欽哉

周墜除大理寺丞制

唐虞之世畫衣冠而民不犯及觀書典君臣相戒以刑
尚慎重如是朕鑒前代於理官尤嚴推擇以爾履歷之
久事多練達其往丞寺使明允之譽稱於廷中則爾職
舉矣欽哉毋忽

章燾大理寺正制

具官某法令人之隄防刑罰治之藥石總在大理聽於
卿師務其公平慎乃推擇以爾持心明允泣事審詳初
直廷中曾無枉撓繼承寺事多所平反克宣再歲之勞
就陟三官之長惟寬仁而不至縱罪惟精密而不為深
文茲謂適中往思汝守

李宣收使功賞轉官制

具官某國嚴銓選制定曩章儻無格法之拘則有甄陞

之寵以爾舊功素著餘賞尚存用進厥官往欽茂渥

宋藻加官制

具官某閩有海寇煩遣王師轉輸雖委於漕臣倚辦亦資於厥屬載疇爾力叙陟華階祇服恩光益思報稱

任文薦加官制

營卒結徒謀為不逞而爾密聞兇計開白守臣既鉏孽萌宜有嘉獎循階一秩往服異恩

宋受等加官制

閩寇干常王師致討既策勲而飲至宜錫爵以第功爰
品戰多用頒賞典遞進武階之秩各欽寵命之永

劉冲等加官制

朕經帷講道記注前聞爾等庀職編摩積有歲月進官
一等用旌厥勤茲謂異恩勉思報稱

周三畏加官制

朕平賦蠲徭厚民生而講治因時制法酌古憲以垂文
載覽成書宜頒寵典具官某材猷練達請讞精明棘寺

平反揚歷十年之久秋卿詳決躋陞八座之聯凡有科
條預聞刊正方國備三登之蓄夫家無七尺之征參考
舊章著為定令嘉奏篇之來上爰增秩以疏榮用賞積
勤往欽茂渥

韓順之加官制

止戈蓋設而弗用除戎則戒于不虞而爾庀職宣勞器
械精備用進美秩以旌厥勤

杜欽雲郭鎮加官制

具官某等屬者鼠竊為患海濱爾等或輸帥閫之謀或擒寇黨之孽有嘉顯績用進厥官祇服恩光勉思職守

陳靖加官制

具官某朕閱武便朝第材禁旅以爾列屬嚴閫之職參華上閣之班程其實能預有成績進陞一秩庸示異恩

孟愈孔奕蘇世能加官制

具官某等朕閱武便朝第能禁旅爾等或有總稽簿書之號或有攷案法律之勞咸進厥官益思自勉

黎初加官制

謹備除戎畢功第賞既稽勞之有式宜錫寵以示公用
循文階勉思職業

王永肩秦亮世熊誠並與遥郡上轉一官制

具官某周以全失總在醫師唐於禁嚴入待君詔故有
稽事制食之政用為褒功勸能之科以爾習知方書察
見色脉供奉神局之內備宣夙夜之勞疇功十全進官
一列遥制戎團之任時為爵秩之榮祇服寵光益思懋

勉

潘溫卿加官制

朕御便朝而閱士校實藝以疏恩載疇宿練之勤宜靡
彛章之限具官某賢聞戚畹胄出慶閱司莞鑰於嚴闈
備宣忠績屬橐鞬於文陛入綴清班攷周環訓厲之功
拘轉受賞延之制用踰常典峻陟華階進陞留務之聯
昭示外嫻之寵往思刻志祗副眷懷

劉堯佐加官制

朕向以龍輜返國蜚炭修陵載疇卜兆之功宜錫進官之寵用增厥秩益謹爾猷

陳章等轉官制

具官某閱武練師程能第賞藝既精而異等寵宜厚以疏榮叙進武階以旌勇力

向子固轉官職制

具官某朕觀前漢循吏六人宣帝得其四而龔黃之政首事盜賊逮治稱流聞則璽書增秩以褒勉之爾守維

揚兼分帥閫績譽休著既勝任矣屬者鼠竊為患海濱
乃能方畧掩捕洗清蒲澤用陟文階之品兼陞延閣之
真其祇茂渥益思拊循以無愧西京之治迺副朕懷

薛璟轉官制

具官某朕信賞待功予心求當爾能權宜措事殲厥首
禍之人爰陞一階用旌爾伐益思自力以副殊恩

三節官屬轉官制

賀正旦
生辰

具官某朕率常遣使修好睦鄰凡從馳驅宜有甄獎叙

遷厥秩式寵其行往祇恩光毋憚勞勩

俊昨轉官制

具官某以爾克輸忠順久捍邊陲載疇歲月之勞叅攷典章之舊叙進厥秩用旌其能祇服恩光勉圖報稱

許制轉官制

具官某罪懼非辜故獲寇釋脅從之黨功疑惟重故旌忠示褒勸之方進爾一官特為異數往思自力以答所蒙

鄭朴推堦子轉一官制

係皇城使
點檢文字

具官某朕閱武便朝第能禁旅爾嚴闔庀職吏牘宣勞庸進厥官以昭勸獎

邢元轉官制

具官某爾仗節奮忠死於王事朕嘉其義故賁以階秩憫其孤故官及嗣子尚有英爽來歆榮之

樊璉轉官制

具官某朕崇東朝而備考養品上藥以輔天和爾父供

奉有勞寵光宜錫既引年而致事爰及嗣以頒恩用陟
美階往祇異數

蔡申轉三官制

具官某頃者椒塗正位歸欵祖禰凡其戚屬悉霑恩渥
時爾服職遠外非朕爾遺今以名聞進秩三等特為異
寵母怠欽承

張頤老轉官制

王師殄冠軍不乏興財用足兵功為可錄爰頒賞典循

爾文階往服恩光益思砥礪

王挺之押天申節馬轉官制

具官某朕猗蘭慶旦職馬之臣以駿來貢而爾紀綱其
行策肥而達進爵一級庸示勸能

賈諱致仕轉官制

朕優賢尚齒尤貴老成之人覽奏引年又嘉止足之義
遽開請謝爰用疏恩具官某策名於時施學於用早著
將輸之效屢宣牧養之勞凡其居官俱有顯績持甘泉

之橐方均佚仙真之祠掛神虎之冠乃列陳鐘漏之語
用頌寵典進陞峻階其安撫於精神以光華於鄉里家
居自適只以觀厲俗之規世賞相承當勿替教忠之訓

李朝正磨勘轉官制

朕觀大舜以三考黜陟致庶績之熙有唐以一曰獻替
為近侍之最顧階陞非拘於法從而章程蓋率於邦彛
具官某學稱儒宗材裕事幹入游郎省茂著握蘭之聲
擢貳民曹亟叅持橐之例比因課績之故法應叙年之

稽循級而遷雖匪賢能不次並行無廢庶幾爵祿之
為差往服恩光益勤猷告

陞加五斗力更轉一官制

徒營較藝膂力挽強載疇出類之能復進歷階之秩往
祇疊寵益勵壯圖

一石五斗弓各轉一官制

因秋閱武被甲控弦爰嘉七札之能用進一階之秩往
祇寵數以奮勇功

葉份致仕轉官制

朕敦風厲俗尚齒優賢觀以禮進退之人為識天盈虛之道宜疏光寵用責休歸具官某早以材猷屢更事任文昌八座入聯紫橐之班竹使一麾出擁朱幡之寄暨分祠祿多閱歲陰迺抗奏以据經欲引年而謝事重違雅志良惜華顛爰躋三品之榮益介六身之壽往祇渥命無怠教忠

羅汝楫郊祀轉官加食邑制

舜考三載以致庶績之熙唐分四善以叅近侍之最朕
於法從之舊固有睠恩之隆至稽叙年必率彛典具官
某懷器凝遠操履剛方執法中司風采見栢臺之正總
綱八座銓衡況金鑑之清出守輔藩丐游真館歲應選
曹之格時均禋祀之休用陞寄祿之階併衍爰田之賦
往祗渥典無怠告猷

張涓轉官制

具官某狂夫不率詭衆造言既明棄市之誅宜示發謀

之賞進官一級以旌厥忠往服寵章以圖報效

張致遠致仕轉官制

賢者於世分出處之二塗明君待臣唯始終之一道進必由禮退而示恩具官某仕逢其時學見於用入居瑣闥星郎高侍從之班出擁朱幡竹使撫雕題之俗聯榮次對均佚真祠偶因嬰疾之微遂有引年之請重違雅尚爰舉彞章用增階品之榮聽遂林泉之適

晁謙之磨勘轉官制

有虞考三載明庶績之熙成周以六計弊羣吏之治乃
眷法從之舊不廢叙年之稽蓋存大公用率彛典具官
某克紹世閥鬱為時材入叅持橐之聯羽儀禁路出守
留司之任管鑰陪都課閱歲於吏銓屬均休於郊燎歷
階增益加地建侯式萃寵光用華藩翰不待次舉雖未
稱於賢能以是為差庶可班於爵祿往欽異數勉迪令
猷

胡深轉官制

具官某爾效命戎行執俘海寇用從賞格叙進武階往服寵光毋忘報稱

雷進押駱馳轉官制

具官某帥四川之臣貢一封之獸而爾紀綱其至視護無傷寵進品階用旌勞勩

沈該磨勘轉官制

考績於三載之間固先最課設官於六品之首迺有定員惟吾侍從之臣靡限拘攣之法具官某學術淹貫吏

能優長擢從天府之浩繁進貳春卿之清近自服禁塗之列就稽銓部之文庸陟美階詎縻曩式適被使華之遣會茲寵數之頒勉迪厥猷往欽予命

梁楊祖磨勘轉官制

朕公爵祿以厲世慎名器之假人法舜之考三載以致庶績之熙稽唐之叅四善以第近待之最顧茲條列亦由次陞具官某世閥高華材猷強濟入奉禁塗之橐出分名郡之麾寶閣道班真祠均佚雖積日之效非所以

責賢而序年之稽且應於陟典爰增美秩用率彝章往
宜欽承毋怠歸報

王瑋除四廂都指揮使知荆南府

改永州防禦使

朕眷今南郡實古郢中接雲夢而通巫巴為一都之會
蔽潭衡而控襄漢分十國之連慎擇守臣兼資武畧具
官某材稱果毅志守精忠提偏師以衛留司固嘗著效
總銳衆以臨湖外亦既宣勞來承召環入對便殿詳觀
敷奏宜任撫綏用更禦侮於零陵其往承流於荆土務

達弛張之理勉圖牧養之勲宜副異恩將觀報政

王喚致仕轉官制

守堅正之居官力思盡瘁積憂勤而成疾固欲遺榮方
勇退以奉身宜憫勞而疏寵具官某仕行其義知無不
為專一心以徇公靡衆訾之遑恤亟膺眷禮擢實要途
京兆赭裾著威聲於彈壓甘泉紫橐叅法從以論思屢
剖竹符丐游琳館朕循名必責其實用人欲盡其材甫
賜召環遽聞上綬嬰沉疴而引第難扶病以造朝爰舉

恩章用增爵秩勉奮精神之養往承渙渥之休

俞侯磨勘轉官制

朕更三載而考績大明黜陟之公操八柄以馭臣不輕
爵祿之予雖為法從亦率曩章具官某資稟疏通材猷
膚敏薦更事任咸有聲稱入持橐於甘泉備釐論思之
益稀鳴桴於京兆素高彈壓之威屢抗需章丐游真館
方從銓選課年勞而陞寄祿之階屬布郊恩進伯爵而
衍爰田之賦特賜異渥榮增一時往祗渙命之優毋怠

嘉猷之告

夏嗣忠轉官制

具官某朕優內宰解職之恩錫給役減年之寵用陞爾秩思副所蒙

錢肅之轉官制

具官某夔濬率職輸幣貢金而爾綱紀其行道塗修阻宜旌勞勩寵進厥官往服恩光益思報稱

蘇楷許宦轉官制

爾等奮忠宣力獲寇執渠既更秩以躡七階之拘復轉官以增三級之寵賞為至厚思稱所蒙

刁靡轉官制

具官某朕睦鄰遣使率屬在塗肆疇萬里之勞特懋三官之賞一更華秩兩進美階茲謂異恩勉思報効

楊傑轉官制

具官某朕以爾父有屬韃之勞未頒於寵典善教輕滿簾之積能掇於賢科茲乃抗封欲其回授叙陞華秩用

表名門祇服恩光毋忘報稱

梅興祖轉一官制

具官某周官於醫以全失差次上下而稽事制食固不
輕授以爾明習方藥服勤滋久甄陞一階庸示勸獎益
祇厥職以答茂恩

李蹈循資制

具官某除姦盜安良民令之職也爾能洗清蒲澤保全
邑城寧惜一階之循因任百里之寄往祇寵渥益務撫

綏

張之德循資制

朕於軍賞固不踰時爾在吏銓初未理選今既効官之久宜甄討賊之功用循文階勉思報稱可

廖供循資制

具官某詩至於頌盛德之事也朕不以位為樂而得奉東朝之養爾職儒官形容孝道燦然歸美用循華階以示嘉獎

張適道循資制

具官某朕於使命遣必疏恩爾在銓曹拘於理選今既任官之正宜循舊賞之資往服恩光勉圖報稱

蒲榮循資制

具官某巴蜀貢金歲時率職而爾道途之遠紀綱其行用循文階以旌勞勩

楊時發循資制

具官某海寇竊發官軍討平而爾奮其精忠與有勞效

用循厥秩思副所蒙

董諒循資制

具官某以爾職在字民功能禦寇保聚而境以固守給
餉而軍不乏興肆疇迺勞用循厥秩益思奮勵以副褒
嘉

曹霽循資制

具官某摧酷擅利佐國餉軍既以羨聞是為職舉用攷
賞格式循文階祇服寵光勉圖報稱

方涇循資制

具官某朕通好殊鄰聘問歲遣凡庀職于其行者定為
彛典以賞其勞循爾文階時乃異數往思懋勉以副恩
光

陳伯彊循資制

具官某古者兵交而使在其間爾能奉命軍前用循文
階以正賞典往思懋勉期稱所蒙

宋藻循資制

具官某唐劉晏固能吏也然其屬皆敏銳故可促督倚
辦以成厥功日者王師討閩寇飛輓餉軍爾預有力焉
用循華階勉思副答

孫誼緣有去失將四官作四資制

具官某朕聞懋軍賞者曾不踰時立戰多者固將超級
爾顯效雖著闕文莫稽宜錫寵以從權俾歷階而進秩
得於已失思稱所蒙